

AO PLENO DA DEPUTACIÓN PROVINCIAL DE LUGO

A necesidade de salvagardar o correcto funcionamento da Institución, que se viu alterado, nos últimos días pola difusión pública de acusacións cara a miña persoa, carentes do máis mínimo sustento fáctico, xurídico e probatorio, e que foron formuladas á marxe de calquera procedemento con garantías, o que conleva a vulneración frontal do principio de presunción de inocencia recollido no art. 24.2 da Constitución Española de 1978, esixe que, pola miña parte, se adopten decisións, persoalmente moi difíciles, que garantan que o funcionamento da Deputación Provincial de Lugo, non se vexa alterado por cuestións alleas ao estrito cumprimento das súas propias competencias.

Quero deixar constancia de que non existe procedemento penal, administrativo ou de calquera outro tipo en trámite contra a miña persoa, nin dilixencia xudicial, disciplinaria ou fiscalizadora que, conforme á legalidade vixente, permita derivar indicio algún de irregularidade ou de conduta inapropiada, o que fai que me encontre nunha situación de absoluta indefensión, xa que descoñezo cales son os feitos dos que se me acusa e as probas en que eses presuntos feitos se basearían.

A situación actual tivo a súa orixe nunhas informacións aparecidas nun medio de comunicación que deu conta dunhas presuntas condutas inapropiadas, que nego con rotundidade, e que, como xa dixeran, carecen de calquera fundamento fáctico e, en consecuencia, probatorio.

A utilización de insinuacións, suposicións e falsas acusacións, de orixe descoñecida, deron lugar a informacións xornalísticas, sen ningún tipo de respaldo documental, contraveñen os máis elementais principios de, interdicción da arbitrariedade e seguridade xurídica consagrados no artigo 9.3 CE.

A situación na que actualmente me encontro representa unha vulneración do principio de dignidade da persoa, recollido no art. 10 da Constitución Española de 1978, así como do meu dereito á honra, á intimidade persoal e familiar e á propia imaxe, recollidos no art. 18 do texto constitucional.

Por todo o exposto, adopto voluntariamente a decisión dolorosa (para non interferir no correcto funcionamento da Institución Provincial á que no últimos seis anos dediqueime de forma tan intensa) de renunciar ao meu cargo de Presidente.

A renuncia que hoxe formalizo non implica, en absoluto, recoñecemento de responsabilidade administrativa, ética ou penal, ao non concorrer na miña persoa ningunha conduta constitutiva de reproche ético e, moito menos, subsumible en ilícito algún. O mantemento dunha campaña de imputacións de condutas irregulares, sen base fáctica algunha, constitúe unha perturbación grave do normal desenvolvemento das funcións propias da Presidencia, incompatibles coa esixencia de eficiencia e boa administración e coa imaxe da propia Institución.

Polas razóns expostas, e sen prexuízo desta renuncia ao cargo unipersoal, manifesto a miña determinación de conservar a miña acta de deputado provincial, conforme ao disposto na normativa anteriormente citada, debido a que a dita condición de deriva do mandato representativo conferido polos/polas cidadáns e cidadás e non ten que atoparse condicionada, limitada nin xuridicamente afectada por manifestacións non sometidas a procedemento legal algún, manifestación que, reitero, son falsas e absolutamente carentes de fundamento.

Reitero, igualmente, o meu compromiso coa legalidade, a transparencia e o máis absoluto respecto a todos e todas os/as compañeiros e compañeiras, xa sexan de partido político ou de traballo, no exercicio das miñas funcións.

Por todo o exposto, con base no disposto nos artigos 52 e 53 do Regulamento orgánico da Deputación provincial de Lugo e no art. 60 do Real Decreto 2568/1986, do 28 de novembro, polo que se aproba o regulamento de organización funcionamento e réxime xurídico das entidades locais,

COMUNICO AO PLENO DA CORPORACIÓN:

1º.- A miña renuncia ao cargo de Presidente da Deputación Provincial de Lugo, que deberá ser aceptada polo Pleno da Corporación, de acordo co disposto no art. 60 do Regulamento Orgánico da Deputación Provincial de Lugo.

2º.- A miña decisión de seguir desempeñando o cargo de Deputado Provincial, electo polo partido xudicial de Monforte de Lemos.

3º.- Tendo solicitado a suspensión de militancia no partido Socialista Obreiro Español, causar baixa no Grupo Provincial do devandito partido, pasando a ter a consideración de membro non adscrito, de acordo co disposto no art. 73.3 da Lei 7/1985, de 2 de abril.

Por último quero manifestar a grandísima honra que supuxo dedicar estes anos da miña vida a servir os intereses da provincia de Lugo, de todos e todas seus cidadáns e cidadás, cunha implicación e dedicación que, creo, está fóra de toda dúbida e desenvolvendo as miñas funcións con total transparencia e respecto absoluto aos principios éticos e dereitos constitucionais de cantas persoas compartiron comigo estes anos.

Lugo ao 12 de decembro de 2025.

Asdo.- José Tomé Roca